



Sessione di l'Assemblea di Corsica
U 24 di settembre di u 2020
Discorsu di u Presidente*
Jean-Guy Talamoni

Care culleghe, Cari culleghi,

Nanzu di principià sta seanza di rientrata, vulerebbe chè no pensessimu à e famiglie in dolu è in particolare quella d'Estelle Susini, nata Bereni, agente di a nostra Cullettività.

In a crisa, crisa longa, incerta è prufonda chè no campemu oghje, ci tocca à fà prova di respunsabilità à u livellu individuale per parà ci da u virus, per cuntinuà à aiutà i persunali medicali, è i nostri chè puderanu pate di e mancanze di a salute in Corsica. Rispettemu tutti e misure sanitarie. Ghjè ciò chè no femu torna oghje cù ste mudalità particolare di riunione.

Al di là di u cunfinamentu, sta crisa ci ramenta, quantu l'omu hà bisognu di l'altri. Avemu bisognu di l'altri per curà ci. Avemu bisognu di l'altri per travaglià. Avemu bisognu di l'altri per esse bè.

Si pensa certe volte chè a ricerca di u soldu pò arricà a felicità. A creazione di ricchezze, ci participemu tutti. Ùn hè u fattu di l'imprese sole. Ci partecipeghjanu di sicuru l'istituzione pubbliche. Or dipoi trenta anni, s'hè intesa a riturnella dicendu chè ci vulia à trasmette, à trasferisce, à dà ognitantu à u privatu, e strade, i battelli, l'aviò, l'aqua, l'aria, u celu eppò u mare. Capace à gestisce, capace à fà, u privatu s'hè inframezzu in tutte i spazii di e nostre vite.

A crisa di u Covid porta à piglià a direzione cuntraria. Privu di cummerciu, u privatu chjama à l'aiutu di u publicu. Privatisazione di i benefizii è cuncentrazione di i debbiti privati nant'à u publicu, ùn ponu chè impuvarisce u cumunu. Ancu i pulitichi chè difendianu l'assicuranze contr'à e mutuale, a clinica contr'à l'uspidale, è tante privatisazione di a posta, di i treni, d'altri beni cumuni, stanu zitti o dumandanu imprestiti è aiuti.

Peccatu ch'ella sia affaccata sta crisa dopu a suppressione di tanti letti d'uspidale. Ch'ella ci fessi misurà quant'è n'avemu tutti bisognu di l'altri è di ripensà e nostre solidarietà. L'ottellu hà bisognu di l'uspidale. U trasportatore hà bisognu di a scola. U ristorante hà bisognu di u museu è d'un ambu pulitu. U professore hà bisognu di strutture di cumunicazione è u zitellu di prugrammi educativi, di libri, d'emissione, di sciali è d'amparera.

À i ghjorni d'oghje, ci tocca à imaginà in furia u perimetru di u campu d'azione di u publicu. Simu chjamati tutti i ghjorni per risponde à tante dumande di sustegnu, di ricunniscenza, di ghjustizia, per u serviziu à a persona cù l'ADMR, cù i marinari o tante professione chè n'avemu tutti bisognu.

In Francia, hè statu u CNR, Cunsigliu Naziunale di a Resistenza, à definisce u spaziu di u publicu, nanzu ch'ellu fussi runzicatu sott'à tutti i guverni di manca è di diritta.

Oghje chì ghjè oghje in Corsica, ci tocca à definisce di modu chjaru ciò chè no vulemu gestisce direttamente è ciò chè no vulemu gestisce cù u sustegnu di u privatu, per a so spertizia è micca solu per lascià li i benefizii. Cumu capisce a privatizzazione di a posta, « La Poste », s'ella hè per finanzia dopu, l'estate, i Canadair è l'inguernu MSAP o d'altre rete di servizii publichi in territorii abbandunati ch'anu persi tutta a so pupulazione ?

Sta crisa ùn hè ancu daretu à noi, ma hè ora mi pare, cum'ellu l'avia fatta u CNR, di purtà a nostra cuntribuzione à a definizione di i servizii publichi chè no vulemu in un isula di u XXIIu seculu. Simu in un tempu di resistenza contru à u Covid, ch'ellu sia dinù un tempu d'ore belle di fratellanza per i più debbuli cum'è per giovani chì ci anu da seguità dumane.

Hè quessa a nostra respunsabilità.

À ringrazià vi.

*Seul le prononcé fait foi